



Starfsreglur Starfsþróunarsjóðs prófessora

1. Um sjóðinn, rétt sjóðfélaga o.fl.

1.1 **Um sjóðinn og markmið.** Starfsemi sjóðsins byggir á samþykkt um Starfsþróunarsjóð prófessora sem stjórn Félags prófessora við ríkisháskóla samþykkti 3. apríl 2012.

Markmið Starfsþróunarsjóðsins er að bæta möguleika félagsmanna til að sækja ráðstefnur, sinna rannsóknum og auka möguleika til rannsóknasamstarfs. Ennfremur er það markmið sjóðsins að styðja skóla og stofnanir þeirra til að gera prófessorum kleift að vinna að verkefnum sem fara saman við markmið beggja á þessum vettvangi.

1.2 **Starfsþróunarsjóður prófessora** er Félags prófessora við ríkisháskóla.

1.3 **Rétt til að sækja um styrki í sjóðinn** hafa prófessorar við ríkisháskóla [við ráðningu í starf prófessors],¹ ríkisháskólar og stofnanir þeirra [...]

1.4 **Fæðingarorlof.** Sjóðfélagar njóta óskertra réttinda í fæðingarorlofi samkvæmt lögum nr. 95/2000 um fæðingar- og foreldraorlof, ef greitt er stéttarfélagsgjald af greiðslum úr Fæðingarorlofssjóði til stéttarfélags.

1.5 **Forgangur.** Ef sjóðspurrð verður eða sjóðurinn stendur illa miðað við tekjur og væntanlegar skuldbindingar að mati sjóðsstjórnar skulu þeir njóta forgangs sem aldrei hafa hlotið fyrirgreiðslu hjá sjóðnum. Ef þá er enn þörf á forgangsröðun er sjóðsstjórn heimilt að gefa fræðilegri verkefnum forgang umfram önnur.

2. Afgreiðsla umsókna

Stjórn sjóðsins fer yfir og afgreiðir umsóknir, sker úr um vafaatriði, t.d. um sjóðsaðild eða styrkhæfi umsókna og tekur á öðrum málum sem upp kunna að koma. Hún kemur eigi sjaldnar saman en þrisvar sinnum á ári, í janúar, júní og október.

3. Umsækjendur

3.1 **Prófessorar hjá ríkisháskólum, ríkisháskólar og stofnanir þeirra** geta sótt um styrk úr sjóðnum vegna verkefna sem um getur í 4. gr.

3.2 **Prófessores emeriti.** Prófessor á eftirlaunum, sem vinnur enn við rannsóknir á vegum háskóla síns getur sótt um styrk til ráðstefnuferðar í tvö ár eftir að hann fer á eftirlaun.

4. Styrkhæfi verkefna

¹ Samþykkt af stjórn Félags prófessora við ríkisháskóla 25. október 2021 og gildir frá og með 1. júlí 2021.

4.1 Inntak verkefnis. Verkefni þarf að jafnaði að varða annað hvort starf eða fagsvið sjóðfélaga til að vera styrkhæft. Starfsþróunarsjóður prófessora leggur áherslu á styrki til a) ráðstefnuferða, b) rannsóknamissera þar sem viðkomandi háskóli greiðir ekki allan ferðakostnað, c) rannsóknasamstarfs við erlenda háskóla og rannsóknastofnanir og d) rannsóknir við háskóla og rannsóknastofnanir sem eru hluti af rannsóknum prófessorsins.

4.2 Hvað er styrkt. Sjóðfélagar geta fengið styrk vegna útlagðs ferðakostnaðar með almenningssamgöngum, hótél- og gistikostnaðar, námskeiðs- og ráðstefnugjalda. Akstur innanlands með einka- eða bílaleigubifreiðum er styrktur um sömu upphæð og lægsta fargjald almenningsvagna nemur.

4.3 Hvað er ekki styrkt. Sjóðurinn styrkir ekki samgöngur innanbæjar, launatap, fæðiskostnað né kaup á námsgögnum. Félagsgjöld fást ekki endurgreidd úr sjóðnum. Tómstundanámskeið eru ekki styrkhæf. Sjóðsstjórn metur vafatilvik.

4.4 Styrkfjárhæð. Hámarksupphæð styrkja miðast við 600.000 kr. á hverju almannaksári. Aldrei eru greiddir hærri styrkir en sem nemur framlögðum reikningum.

5. Umsóknir, frágangur þeirra og afgreiðsla

5.1 Umsóknir. Sótt er um styrk á vefsíðu Félags prófessora (www.professorar.hi.is) á þar til gerðu eyðiblaði. Sjóðfélagar skulu vanda frágang umsókna og fylgja leiðbeiningum á umsóknareyðublaði. Öllum fylgigögnum skal hlaða inn með umsókninni.

5.2 Skilafrestur. Umsókn um styrk skal berast sjóðnum innan árs frá lokum verkefnis.

6. Styrkveitingar úr sjóðnum

6.1 Framvísun gagna. Greiðslur úr sjóðnum fara að jafnaði fram gegn framvísun *pdf* afrita frumgagna .

6.2 Staðfesting á verkefni. Auk framvísunar gagna þarf að sýna fram á, t.d. með dagskrá eða þátttökulista að styrkurinn mæti kostnaði við verkefnið sem sótt er um. Staðfesting þarf að koma frá öðrum aðila en umsækjanda sjálfum. Nauðsynlegt er því að halda til haga öllum gögnum.

6.3 Útborgun styrks. Styrkir úr sjóðnum eru að jafnaði greiddir út að úthlutunarfundum loknum. Þegar styrkur hefur verið greiddur sjóðfélaga er afgreiðslan tilkynnt honum með tölvuskeyti.

6.4 Styrktímabil. Styrktímabil er almannaksárið. Á því tímabili er hægt að veita einn eða fleiri styrki að hámarksupphæð

6.5 Tvígreiðsla eða ofgreiðsla styrks. Ef mistök verða í afgreiðslu styrkumsóknar eða greiðslu styrks munu starfsmenn sjóðsins leitast við að leiðrétta þau eins fljótt og hægt er. Ef sjóðfélagi hefur fengið tvígreiddan styrk eða ofgreidda styrkupphæð ber honum að tilkynna sjóðnum mistökin og endurgreiða þegar í stað þá hina ofgreiddu fjárhæð.

6.6 Upplýsingar til skattfirvalda. Í byrjun hvers árs eru sendar upplýsingar til skattfirvalda þar sem gerð er grein fyrir styrkþegum og styrkupphæðum síðastliðins árs. Styrkir starfsþróunarsjóðs eru framtalsskyldir en ekki skattskyldir.

7. Hlé eða rof á sjóðsaðild

7.1 **Launalaust leyfi.** Sjóðfélagi í launalausum leyfi á rétt á styrk samkvæmt reglum sjóðsins fyrstu 6 mánuði að öðrum skilyrðum uppfylltum.

7.2 **Atvinnuleysi.** Sjóðfélagar sem orðið hafa atvinnulausir geta sótt um og fengið styrk úr sjóðnum samkvæmt eftirfarandi reglum:

a. **Skilyrði.** Umsækjandi skal hafa átt aðild að sjóðnum í a.m.k. eitt ár [...]² og að ekki séu liðnir meira en 12 mánuðir síðan hann missti vinnuna.

b. **Ferli umsókna.** Um form og afgreiðslu umsókna atvinnulausra gilda að öðru leyti sömu starfsreglur og um sjóðfélaga og styrkveitingar til þeirra.

7.3 **Annað rof á aðild.** Stjórn sjóðsins ákveður hverju sinni hvort og hvernig meta skuli eldri sjóðsaðild til að brúa rof á aðild. Rof á aðild getur þó aldrei verið lengra en 4 mánuðir.

8. Málskotsréttur

Ef sjóðfélagi er ósáttur við afgreiðslu sjóðsins á styrkumsókn sinni og fylgigögnum á hann ávallt rétt á að vísa erindi sínu á ný til stjórnar sjóðsins. Verður afgreiðslan þá tekin upp á næsta fundi stjórnar.

9. Gildistökuákvæði

Reglur þessar voru samþykktar af stjórn Starfsþróunarsjóðs prófessora 13. október 2017 og stjórn Félags prófessora við ríkisháskóla 2. nóvember 2017. Þær taka gildi við birtingu á heimasíðu Félags prófessora við ríkisháskóla.

Ákvæði til bráðabirgða:³

Þrátt fyrir grein 3.2 er stjórn sjóðsins heimilt að víkja frá tveggja ára tímamarkinu, enda berist sjóðnum umsókn frá prófessor á eftirlaunum sem vinnur enn við rannsóknir á vegum háskóla síns, og Covid-19 heimsfaraldurinn kom í veg fyrir að heimildin væri nýtt innan tímamarkanna. Ákvæðið öðlast gildi 19. febrúar 2021 gildir til 1. mars 2023.

F.h. stjórnar Starfsþróunarsjóðs prófessora F.h. stjórnar Félags prófessora við ríkisháskóla

² Samþykkt af stjórn Félags prófessora við ríkisháskóla 25. október 2021 og gildir frá og með 1. júlí 2021.

³ Samþykkt af stjórn Félags prófessora við ríkisháskóla 19. febrúar 2021.